

乾隆東安志

陳寶泉
題



東安縣志卷之十九

奏疏

授大將軍加散騎常侍謝恩表

晉劉琨

陛下略臣大愆錄臣小善猥蒙天恩光授殊寵顯以蟬冕之榮崇以上將之位伏省詔書五情飛越臣聞晉文以卻縠爲元師而定霸功高祖以韓信爲大將而成王業咸有敦詩閱禮之德戎昭果毅之威故能振豐功於荊南拓洪基於河北況臣凡陋擬蹤前哲俯懼折鼎慮在覆餗昔曹沫三北而收功於柯盟馮異垂翅而奮翼於澠池皆能因敗爲成以功補過陛下宥過之恩已隆而臣自新之善不立臣雖不逮預聞前訓恭讓之節臣猶庶幾所以冒承寵命者實欲沒身報國輒死自效要以致命疆場盡其臣節至於寵榮之施非言辭所謝又謁者史蘭殿中中郎王春等繼至奉詔臣俯尋聖旨伏紙飲淚臣聞夷險流行古今代有靈厭皇德曾未悔禍蟻狄縱毒於神州夷裔肆虐於上國七廟闕禋祀之饗百官喪彝倫之序梓宮淪辱山陵未兆率土

永慕思同考妣陛下龍姿日茂叡質彌光升區宇於既頽崇社稷於已替四海之內肇有上下九服之氓復觀典制伏惟陛下蒙塵於外越在秦郊蒸嘗之敬在心桑梓之思未克臣備位歷年才質駑下邱山之釁已彰毫釐之效未著頃以時宜權假號位竟無殪戎之績而有負乘之累當肆刑書以明黜陟是以臣前表上聞敢緣愚款乞奉先朝之班苟存偏帥之職赦其三敗之愆收其一功之用得騁志戎疆快意大逆雖身膏野草無恨黃墟陛下偏恩過隆曲蒙擢拔遂授上將位兼常伯征討之務得從事宜拜命驚惶五情戰悸懼致隕越以爲朝羞昔申胥不狗柏舉而成公壻之勳伍員不從城父而濟入郢之庸臣雖頑凶無覲古人期於被堅執銳致身寇讐所謂天地之施羣生莫謝不勝受恩至深謹拜表陳聞

爲劉琨理冤疏

晉 盧 諶

臣聞經國之體在於崇明典刑立政之務期於固慎關塞況方岳之臣殺生之柄而可不正其枉直以杜其姦邪哉竊見故司空廣武侯琨在惠帝擾攘

之際值羣凶鼎沸之難勦力皇家義誠彌厲躬統華夷親受矢石石超授首
呂朗面縛社稷克寧鑾輿反駕奉迎之勲琨實爲隆此琨效忠之一驗也其
後并州刺史東嬴公騰以晉川荒匱移鎮臨漳太原西河盡徙三魏琨受任
并州屬承其弊到官之日遺戶無幾當易危之勢處難濟之土鳩集傷痍撫
和戎狄數年之間公私漸振會京都失守羣逆縱逸邊萌頓仆苟懷宴安咸
以爲并州之地四塞爲固且可閉關守險蓄資養徒琨抗辭厲聲忠亮奮發
以爲天子沈辱而不隕身死節情非所安遂乃跋履山川東西征討屠各乘
虛晉陽沮潰琨父母罹屠戮之殃門族受殲夷之禍向使琨從州人之心爲
自守之計則聖朝未必加誅而賊黨可以不喪及猗盧敗亂晉人歸奔琨於
平城納其初附將軍箕澹又以爲此雖晉人久在荒裔難以法整不可便用
琨又讓之義行於色假從澹議偷於苟存則宴然於并土必不亡身於燕薊
也琨自以備位方嶽綱維不舉無緣虛荷大任坐居三司是以陛下登祚便
引愆告遜前後章表具陳誠款尋令從事中郎臣續澹以章綬節傳奉還本

朝與匹磾使榮邵期一時俱發又匹磾以琨王室大臣懼奪已威重忌琨之形漸彰於外琨知其如此慮不可久欲遣妻息大小盡詣京城以其家室一委陛下有征舉之會則身充一卒若匹磾縱凶慝則妻息可免具令臣澹密宣此旨求詔勅路次令相迎衛會王成從平陽逃來說南陽王保稱號隴右士衆甚盛當移關中匹磾聞此私懷顧望留停榮邵欲遣前兼鴻臚邊邈奉使詣保懼澹獨南言其此事遂不許引路丹誠赤心卒不上達匹磾兄眷喪亡嗣子幼弱欲因奔喪奪取其國又自以欺國陵家懷邪樂禍恐父母宗黨不容其罪是以卷甲囊弓陰圖作亂欲害其從叔麟從弟末桮等以取其國匹磾親信密告麟桮麟桮乃遣人拒之匹磾僅以身免百姓謂匹磾已沒皆憑向琨若琨於時有害匹磾之情則居然可擒不復勞以人力自此之後上下並離匹磾遂欲盡勒夷晉徙居上谷琨深不然之勸移厭次南憑朝廷匹磾不能納反禍害父息四人從兄二息同時并命琨未遇害知匹磾必有禍心語臣等云受國厚恩不能克報雖才略不及亦由遇此厄運人誰不死死

生命也惟恨下不能效節於一方上不得歸誠於陛下辭旨慷慨動於左右
匹禪既害琨橫加誣謗言琨欲闕神器謀圖不軌琨既無術囂頑凶之思又
無信布懼誅之情踦躓亂亡之際夾肩異類之間而有如此之心哉雖臧獲
之愚廝養之智猶不爲之況在國士之列忠節先著者乎匹禪之害琨稱陛
下密詔琨信有罪陛下加誅自當肆諸市朝與衆棄之不令殊俗之豎戮台
輔之臣亦已明矣然則擅詔有罪雖小必誅矯制有功雖大不論正以興替
之根咸在於此開塞之由不可不閉故也而匹禪無所顧忌怙亂專殺虛假
王命虐害鼎臣辱諸夏之望敗王室之法是可忍也孰不可忍若聖朝猶加
隱忍未明大體則不逞之人襲匹禪之跡殺生自由好惡任意陛下將何以
誅之哉折衝厭難唯存戰勝之將除暴討亂必須智畧之臣故古語云山有
猛獸藜藿爲之不採非虛言也自河以北幽并以南醜類有所顧憚者唯琨
而已琨受害之後羣凶欣欣莫不得意鼓行中州曾無纖介此又華夷小大
所以長歎者也伏惟陛下叡聖之隆中興之緒方將平章典刑以經序萬國

而琨受害非所冤痛已甚未聞朝廷有以甄論昔壺關三老訟衛太子之罪谷永劉向辨陳湯之功下足以明功罪之分上足以悟聖主之懷臣等祖考以來世受殊遇入侍翠帷出簪彤管弗克負荷播越遐荒與琨周旋接事終始是以仰慕三臣在昔之義謹陳本末冒昧上聞仰希聖朝曲賜哀察

災異陳事疏

李侃
都御史

臣侃謹題爲陳言事該欽天監奏土星犯上相星逆行紫微垣等因奉聖旨上天仁愛垂象警戒朕當省悟五府六部都察院計議寬恤條例看此欽此臣有以知皇上敬天修德之誠猶成湯以六事自責之心也臣聞漢儒董仲舒曰國家將有失道之敗天乃先出災害以譴告之不知自省又出怪異以警戒之尙不知變而傷敗乃至此見天心仁愛人君而欲止其亂也故自古聖明之君遇災異之興皆悔過自責避殿減膳恤物安民而災異自滅轉禍爲福焉當正統之末姦臣擅柄流毒四海軍民嗟怨以致上天垂戒災異迭興不知警懼卒致大變其監不遠幸賴上龍飛九五敬天勤民誅權姦而掃

除弊政任賢俊以輔佐中興天下始安人民交慶故即位以來四時順序陰陽調和災異不興人民安堵實皇上勵精圖治之所致也邇來災異忽作雷雨振塔星象垂戒原其所自必有繇然豈非政事有所未平臣職有所未盡歟今年朝覲官吏失職令運糧邊城以濟饑餓雖皇上憂民之誠但山東河南山西官吏假就道運糧俱回原任必指此爲由橫加科歛以虐其下其京運者又加倍揭借亦欲回任科歛以償所負天下之民其何能堪邊儲雖充而下民受害是猶割肢體以啖口腹雖飽而肢體竭矣不惟變廉以爲貪其實害民而敝政天之垂戒寧不有在於此乎近蒙勅禮部度僧三萬竊以四方未寧邊陲多事正宜廣積士卒以攘寇盜減省無益以裕民食苟耕者衆而食者寡則民食足而邦本固矣今奉命廣度僧牒使逃軍逃民必避重以投輕遊手遊食必易服以逃稅唐韓愈所謂農之家一而食粟之家六奈之何民不窮且盜也昨因雷雨之戒少保兵部尙書于謙意欲暫停僧牒未蒙許允天之垂戒又寧不有在於此乎昔唐太宗謂侍臣曰比有上書條敷甚

多朕總粘之屋壁出入觀省所以孜孜不倦欲盡臣下情也近吏部文選司李賢上興政本十事皆欲上端本澄心絕去嗜欲德同堯舜仁邁三王皇上宜留奏章於內時賜睿覽誠有補聖躬今未蒙留覽恐無以盡臣下之情開諫諍之路以回上天之變也然天之垂戒雖由行政之未平實由臣職之未盡昔唐太宗發卒修洛陽宮給事中張元素上章極諫而止今臣叨爲諫官職當言路不能效古人盡言極諫拾遺補闕以致上天垂戒合當有罪乞將臣罷黜爲民以爲言官之戒伏望皇上敬天勤民用賢納諫勅各處巡撫巡按官員禁約巡察朝覲官吏回任時不許科歛財物以虐下民暫停僧牒省無益之費以紓農力凡臣下諫章有匡救切直之言者乞留於內時時觀覽以補聖德如此則可以彌災異回天心而措斯民於雍熙太和之世矣

又

李侃

臣侃謹題爲陳言事竊惟自古聖帝明王致天下之太平者未有不順天心順人心而爲治者也夫人心即天心也書曰天視自我民視天聽自我民聽

人心悅則和氣上行四時順序雨暘時若禎祥迭見災異不興而天心順矣人心怨則乖氣上行四時失序水旱相仍妖孽屢見禍亂並起而天心違矣順則天眷必隆違則天命必厭故聖王爲治必以順天心順人心爲先務焉順之何如在於審察羣情同其欲惡親賢臣勤政務戒逸遊此人心之所同欲也聖王必順人心以行之親佞臣怠政事好逸樂此人心之所同惡也聖王必順人心以去之是以億兆歸心天下其有不安者乎昔我太祖高皇帝太宗文皇帝之應天順人以致天下之太平者未有不本於此也迨我上皇帝之在位也信任王振恩寵太過以致竊弄大權擅作威福朝廷不得親近賢臣以詢下情大臣不得密侍左右以論治道早晚二朝祇應故事蒙蔽聰明假傳詔旨上澤缺於下布下情壅於上聞天下嗟怨乖氣上行皇天震怒怪異迭見傷敗之兆已昭昭矣王振猶不知悟專權自恃乃逼駕親征強敵突來遂致失陷九廟震驚萬方搖動軍民怨其貪暴皆欲啖其肉而食其心朝廷恨其專權已籍其家而滅其族誠足以謝天人之怒矣使王振感恩知

報竭忠守分非惟令終令聞而子姓宗族亦得永享太平之福矣人言王振之姦無與敵臣觀王振之愚無與比上燭其姦已付誅鋤今日之治不可不以前日爲鑑也恭逢聖明御治之初天下臣民莫不企竦觀聽以爲必更前日之失以順天人心不意上即位以來仍習前日故事君臣道隔下情不通何以建維新之業慰四海之望伏願皇上奮揚英武總攬大權躬勤政務悲勅萬幾親儒臣以識古今之興衰延大臣以議政事之得失則否消而泰至矣蓋上下交則謂之泰上下不交則謂之否臣觀易象列卦天在下而地處上於位乖矣謂之泰者上下交故也君在上而臣處下於意順矣謂之否者上下不交故也君澤下流臣誠上達然後理道立而治道泰矣上誠能俯延羣臣以通下情則天下之人莫不心悅誠服智者盡其謀勇者效其力文臣武士誰不竭忠圖報如此則天下易定社稷易安上皇可歸而國恥可雪矣臣職當言路寧敢保全身家緘默不言以上負朝廷下負民望謹陳愚直伏待採擇臣不勝戰慄之至

信詔旨以正國法疏

明 許復禮 兵科都給

頃者錦衣衛左等所鑾輿等司旗校王邦奇等奏本到科爲懇乞天恩比例查功復職等情臣等披閱奏詞不勝驚愕不意陛下維新之日輒敢有此頑梗作奸之徒以惑亂聖聽此事關理亂之機臣等不容緘默照得皇上登極節奉詔旨正德元年以後各衙門官軍旗校人等緝捕妖言奸細并不係臨陣對敵強賊一應陞授職役者通行查革欽此欽遵今王邦奇等係先年廠衛緝捕妖言奸細近奉詔旨查革人數先該兵部題爲開讀事請差科道部屬等官遵照詔旨內事理查革題奉欽依選得兵科給事中夏言四川道監察御史鄭本公兵部武選清吏司主事汪文盛錦衣衛千戶陳澍李經公同會勘各據本衛所關造文冊兵部選官堂稿各人親供逐一清查磨對扣筭停當備造文冊會本題請欽依是這冒濫人員既會同清查明白并其餘事情該部都看了來說欽此欽遵隨該兵部題覆節奉旨是各該官員旗校都依擬查革中間係職官革盡職級的還與他官帶閒住被革人員有朦朧奏

辨的你部裏及該科叅奏重治欽此欽遵先因錦衣衛旗校費宏等及王邦奇等六次抗違詔書奏辨復職已經臣等六次叅出兵部立案未經究治今又妄引勅諭撫拾勘官大爲欺罔之詞巧肆朦朧之語惟欲蠱惑乎聖聽不顧有違詔書其間至毀勘官爲奸邪指查革爲欺罔是非倒置變白爲黑大肆狂悖之言無復忌憚之意則是狐鼠得其依憑而目中已無法度矣此輩若猶縱而不治將何所紀極乎且奏內首以遵勅旨爲言乃爲近者節奉修省之勅諭也夫罷冗員裁冒濫乃爲修省敬天之實未聞冗濫復職而反謂之修德動天也查得弘治二年七月內該禮科都給事中等官韓重等題爲修省弭災事內稱武職非軍功得陞旗校因行事陞職甚非祖宗舊制合通行查革具題節奉孝宗皇帝聖旨是拿妖言的只照成化年例給賞不陞拿強盜的應捕人員照舊不陞定爲例欽此大哉聖訓萬世當遵以此觀之先朝修省弭災正欲禁革冒濫而邦奇等乃引此以爲查革復職之媒不亦謬乎知勅諭之當遵則必知詔書之不可違今未遵勅諭而先違詔旨亦獨何

哉蓋在先朝權奸用事納賄賣官中官弟姪濫叨封爵權門廝役驟得美官金紫雜沓於班行車馬喧填於道路至於廠衛陞遷尤爲驟易倚仗權奸之勢竊弄威福之權串通番子誣捏平民不由法司鍊成大罪或一年而兩次類奏或乘便而陳乞陞官神人共怒道路興嗟幸賴上飛龍九五開國承家數年冒濫賁緣奉詔盡行裁革或追奪誥券爲民或削除職級歸伍事出至公裁之聖斷臣民恪守孰敢愆違今邦奇等屢恃頑冥肆行抗奏自非依憑城社倚任錢神何敢乃爾盍不思嘉靖乃正德之改元倖門不容再闢詔旨又中興之命脈新政豈可阻撓倘隄防一決潰突滔天末流難治典守者安得不預遏其邪心哉其奏內稱見在食糧者止百十餘人似欲以少自恕而幸其或可見容也然一人破例千百隨之容一人是容千百人矣況百餘人乎況中興一詔挽人心於旣去之餘圖治化於更新之始昭如日星天下共見朝廷紀綱法度率由此立理亂攸關誰得冒犯今必違之是壞亂紀綱法度欲轉嘉靖之治而爲正德之年矣且正德元年治道未始不善而二年之

後竟爾變之非遽變也亦由小人潛通僥倖之門而執法者因循不守始以徇情示私卒至極亂大壞幾危社稷殷監不遠豈宜復蹈故孔子贊易乾則致謹於幾坤則致戒於漸良有以也況前日查革之餘邦奇等尙有旗校之籍若果奉公効勞自有榮進之途何苦惓惓不舍爲非分無益之求自罹於罪戾耶又況聖恩浩蕩不追既往與物自新邦奇輩自合安分懷刑以觀太平之盛可也乃敢屢逞狂悖之詞甘蹈充發之罪蓋由邇來法令不行事尙姑息以致人情玩忽養成奸宄之風上下相安而不自覺矣臣等伏望皇上大奮乾剛痛懲往事守惟新之詔旨使羣小不得以抗違申渙汗之綸音俾奸宄不得以拂戾乞勅法司將王邦奇一千人犯收捕下獄從重問擬遵照聖旨押發邊衛充軍以爲小人欺罔之戒庶法令昭明倖進者知所止矣

慎名器以愜公論疏

許復禮

頃者該兵部具題爲欽奉事據通政使司送據蕭讜等各告受廕前來本部欲便遵照節奉勅旨將蕭讜等廕授指揮千百戶俱照後開註定錦衣衛各

所司帶俸等因題奉聖旨這各官都照原降勅旨與世襲蕭讜等着堂上帶俸張潤等各依擬銓註管事內府衙門該祿米的着戶部查照勅旨行欽此隨該兵部覆題前事內開蕭讜張潤等不係軍功槩與世襲不由考選俱令管事上輕國家之名器下貽讜等之罪愆等因題奉聖旨已有旨了欽此臣等竊惟恩賞一事前日羣臣交章諫止情已罄矣詞已竭矣未蒙俞允近日吏兵二部及各衙門及南京六科十三道等官亦皆交章奏請未蒙准信臣等仰承聖意遲延月日不用連章數諫者以俟聖心開悟洞見輿情不以改易爲難而以從善爲貴且使要於至當而後已迄今閱日之久大臣累疏辭免而尙未得處戚畹近習宴然冒受而醞釀益深夫爵賞本爲勸功也衆悅而後賞之理之常也今陛下延賞群臣而使物議沸騰如此則亦何貴於賞哉況錦衣係近侍衙門所關者重若不待選擇而槩以蔭叙私及其人則將來戚畹近習比例夤緣充斥衛所耗廩祿而竊威權又將復蹈正德年間之轍矣況世襲必由軍功見任必待考選此祖宗之成法累朝之事例若一旦

廢之何以定內外武臣之法守而服天下後世之心哉臣等職司言路今雖循默順旨天下後世必將以今日爲濫賞且責臣等以不言之罪臣等與其受天下萬世之責且陷上於有過孰若披瀝肝膽盡言於上以待斧鉞之誅也且此舉未善若一人言之而輿論未協未足信也小臣言之而遠臣未言未足信也今大小臣工合詞奏請遠邇臣庶不約而同陛下獨可執之而自信乎聖王本人情以爲治苟違公議恐非與衆圖成之道也陛下試於便殿燕閒之時悉取前後諸臣所上章奏遍閱而詳察之其意可以自見矣密勿大臣功在社稷誠有如聖諭諄復慰勉者陛下尙且准辭伯爵況近習之蔭授顧敢居然冒受乎前日南御史陶儼等奏稱中外臣民咸謂陛下偏厚戚屬欲徇其苟得之情故連擊內閣以息其私賞之議今若此則是果如人言矣紛紛物議何時而能解息乎且封廕過制在諸臣則受貪冒之名在陛下則蒙濫與之失本以廣仁恩反以虧聖治臣等竊爲陛下不取也然戚畹驟進已不厭衆心而都尉封侯則難開事例從龍超擢已爲過望司禮舊任自